



UNIVERSITÄTS-
BIBLIOTHEK
PADERBORN

Universitätsbibliothek Paderborn

Gvilielmi Becani E Societate Iesv Idyllia Et Elegiae

Becanus, Gulielmus

Antverpiae, 1655

Elegia IV. Pastores erant in regione eâdem vigilantes, & custodientes vigilias noctis super gregem suum. Lucae 2.

urn:nbn:de:hbz:466:1-12773

299

47

ELEGIARVM LIB. I.

Vt cunctis egeat, cuius sunt omnia donum ;
 Ut, per quem læti degimus, ipse gemat !
 Auditis ? teneris totum vagitibus antrum
 Personat: & gemitus vox quoque prima Deo est.
 Virgo parens flenti turgentes siccat ocellos;
 Et lacrymis, eheu ! spargitur ipsa suis.
 Parce puer, quibus hanc crucies, dare signa doloris:
 Aptior adueniet planctibus hora tuis.
 Tempus in hoc illos differ, dum, quod modò pun-
 gunt
 Stramina, diuellent flagra cruenta latus.
 Dum crux præsepi succedet; sanguis, & ipsæ
 Pro pannis plagæ dum tua membra tegent.
 Incipe nunc dulci matrem cognoscere risu :
 Incipe virgineo velle sedere sinu.
 Molliter illa suis compressum stringat in vlnis,
 Et ducat blandas cara per ora manus.
 Et modò blanditias leni tibi murmure dicat :
 Et modò det roseis oscula multa genis.
 Oscula quæ stabuli brumæq; incommoda pensent,
 Oscula quæ cælo te petiisse iuuet.

ELEGIA IV.

*Pastores erant in regione eâdem vigilantes,
 & custodientes vigilias noctis super gre-
 gem suum. Lucæ 2.*

Pastores ouium, cælo gratissima pubes,
 Assuetum campis, innocuumque genus,
 Ut gregis hæc vobis custodia numine fausto
 Obrigit ! vt pretium grande laboris erit!

Cernitis

Cernitis Aligerum latus per inane volatus?
 Æthereo quantus splendeat axe nitor?
 Cernitis, in terras ut Caliregia migret,
 Et nostro dominum quærat in orbe suum?
 Illum iam vobis natum Davidis in vrbe
 Iessæis virgo regibus orta fouet.
 Ite, sacros partus, demissaque pignora celo,
 Cumque suam puerum visite Mater Deum.
 En vocat æthereum festis concentibus agmen,
 Quaque vocat, radiis lux noua signat iter.
 Nec quemquam, quod sit vilis, quod rustica, tardet
 Sors sua: nec pudeat, turba quod estis inops.
 Non auro, non ille iacet spectabilis ostro:
 Non licetor clausas excubat ante fores.
 Adstabunt cunis (cunæ præsepia, panni
 Velamen, lectus canna palustris erunt)
 Adstabunt cunis, puerumque animalia cingent:
 Custodes habet hos corporis ille sui.
 Cetera conueniunt: absint genitricis amores
 Sedulitasque, nihil, quo recreetur, erit.
 Parua licet fuerint, tamen esse videbitis illi
 Præcipuas, quæ vos dona feretis, opes.
 Lac tepidum, passas Engaddi collibus uas,
 Defruta, & in ceris condita mella suis,
 Quæque parens teneris substernat vellera membris,
 (Hei mihi! læserunt stramina molle latus)
 Excipiet gaudens, & quo fugat æthere nubes,
 Vos illo aspiciet leniter ore puer.
 Vestraque brachiolis complectens munera paruis,
 Quæ poterit, matri porriget illa suæ.
 Heu pietas! vix sacra pedem sub recta tulere,
 Et tergit lacrymas (fleuerat antè) puer:

Seque

Seque salutantes vultu ridente salutat,
Quodque Deum prodat, spargit ab ore iubar.
Deproperant illi tenui munuscula cultu,
Procumbuntque solo, concipiuntque preces.
Atque aliquis, quidni facilis pastoribus adsis
Care puer? fies tu quoque pastor, ait:
Te nec oues lassas humeris gestare pigebit,
Nec medicas agris applicuisse manus.
Non erit armentis leo te custode timendus,
Tutaque se mediis inferet agna lupis.
Vbera lacte domum referent distenta capellæ:
In pratis aries vellera tineta geret.
Pabula sufficient steriles iucunda myricæ,
Crescet arenoso fertilis herba solo.
Eia age care puer: tecum noua nascitur ætas,
Primus ab integro temporis ordo redit.
Ferreæ deficiet, toto gens aurea mundo
Surget: iustitiam quælibet ora colet.
Te duce, si qua manent sceleris vestigia nostri,
Irrita nullius causa timoris erunt:
Tu noua progenies celo demitteris alto,
Occlusamque diu pandis ad astra viam.
Eia age care puer, magnum patris incrementum,
Cara Dei soboles, noster & orbis amor.
Aspice, venturo lætentur vt omnia sæclo,
Vt pax nascenti rideat alma tibi.
Horrida iam positis mitescent sæcula bellis:
Iunget amor populos: otia mundus aget.
Nec rastros patietur humus, nec vinea falcem:
Sponte suâ campos mollis arista teget.
Aurea mala ferent quercus, rubus asper amomum,
Alnus narcissos, & salijunca rosas.

D

Occidet

50 GUILIELMI BECANI

Occidet herba nocens, perdent aconita venenum,
Stactea de taxi cortice gutta fluet.
Occidet & serpens, quâ decipiente parentes
Lethalis fusa est in genus omne lues.
Dixerat: applaudunt comites: notat omnia Virgo,
Et pariter tacitâ gaudia mente fouent.
Memiserum! quòd non hos inter noctibus illis
Sit mihi seruandi tradita cura gregis;
Nec stabulum, & cunas, positumque in stramine
regem
Eius spectauit pars ego magna chori.
Quod licet, illarum se pascit imagine rerum,
Et stabulum & cunas mens sibi nostra facit.
Ante oculos puerum fingo, puerique parentem,
Ante oculos asinum cum boue stare meos.
Oscula sacratissimâ iuuat hîc infigere cunis:
Hîc iuuat ad teneros procubuisse pedes:
Et pueri dulces, & dulces cernere fletus
Matris, & his visis non retinere meos.
Diuinis oculis vt primùm expresserat illos,
Dixit Amor telis nil opus esse suis.
Proiice tela puer, pharetram depone, facesque:
Iam lacrymæ domini sunt mea flamma mei.



ELE-